

Recordando Juancho Irausquin

One person can make a difference

ORANJESTAD (AAN): Awe 20 di juni Fundacion Juancho Irausquin ta recorda e fayecimiento di Juan Enrique Irausquin q.e.p.d.. Riba e fecha aki den aña 1962 Aruba tabata na luto pasobra nan a perde un gran politico cu un curason humilde. Un persona cu tabatin e vision pa desaroya e

economia di Aruba pa termino largo. Esaki ta e herencia cu e a laga atras pa nos pueblo.

Si e lo tabata na bida ainda e lo ta orguyoso pa wak cu su vision pa desaroya e economia di Aruba cu un Segundo pilar cu ta Turismo a bira realidad. Mas ainda cu Turismo a bira e prome pilar

di e economia di Aruba. E momento cu Juancho Irausquin a tuma e prome pasonan pa nos Industria di Turismo, su preocupacion tabata pa e trahadornan.

Lago tabata layoff hende y su deseo tabata pa segura trabao pa e trahadornan door di tin un otro pilar di economia. Na e momento ei

na aña 1950 el a sigura trabao pa trahador. Pero tambe despues di su fayecimiento su vision y siguranza a salbuardia Aruba ora Lago a sera. Su vision pa wak pa mayan y pa e futuro di Aruba a pone cu nos a logra di pasa den e tempo duro ora Lago a sera. Ora Juancho Irausquin a drenta den gobierno na aña 1954 el a cuminsa mesora cu su planan pa traha un hotel, amplia WEB etc.

Trahandando duro, oras largo pa desaroya Aruba e momento ei. Pero Juancho Irausquin tabata un persona cu tabata wak pa e futuro tambe. Hunto cu su colleganan e a traha un plan di 10 aña. Un plan pa sigui desaroya Aruba y garantiza e economia y turismo di Aruba.

E plan tabata riba 11 tereno y a costa 222 million Florin. E plan complete a worde entrega na februari 1962. Lastima cu e tempo no a dura hopi ya cu e a fayace 20 di juni 1962. Pero toch Aruba a logra di haya e frutonan di e vision di Juancho Irausquin cu e a laga un plan di trabao pa 10 aña atras. Juancho Irausquin tabata "the right man, on the right place at the right time". Juancho Irausquin tabata un persona cu tabata traha riba tur tereno. Como bankero e tabata experto riba tereno financiero-economico.

Pero como persona cu curazon grandi nunca el a lubida e pueblo y e personanan di menos recurso. Su cas tabata semper habri pa tur hende. Su garage tabata jen di mercancia pa duna na e esnan den necesidad. Na tur manera e tabata sirbi e pueblo di Aruba, cu conseho, mercancia y financieramento. Ta hopi ta esun cu Juancho a yuda den e bida relativamente cortico cu e tabatin. E tabata

biba e mandamento di Stima bo prohimo. No por nada Juancho a worde yama Sirbidor di Pueblo.

Pa percura pa e personanan cu menos recurso el a bin cu leynan pa proteha e personanan ki. el a percura pa e grandinan cu tabata depende di e shonnan pa por sobrevivi ora e tabata imposible pa haya trabao door di nan edad. Juancho a percura pa tin un ley di pensioen cu tabata garantiza e grandinan un entrada ora nan a yega e momento cu nan no por a traha mas.

Tambe el a percura pa ley di vuida y huerfanonan pa garantiza un entrada na momento duro ora e casa/tata ta fayace. Pa Juancho Irausquin no tabatin distincion den hende. el a traha pa tur.

Juancho Irausquin tabata desea pa tur persona tin e mesun oportunidad den bida. Pa garantiza oportunidad den bida educacion ta primordial. Den e tempo di Juancho Irausquin no tur mucha tabatin e posibilidad pa bay school of studia afo. Esun cu por a percura financieramente tabatin e oportunidad. Pesey Juancho a percura cu school ta liber y cu tin beca pa tur mucha por haya e oportunidad pa studia. Te awe nos ta disfruta di e oportunidad cu e a duna nos pa bay dilanti. Igualdad, oportunidad y dignidad pa e ser humano sin distincion tabata e idealnan di Juancho Irausquin. Un persona cu vision, inspiracion, dedicacion incansable pero pa tur esun cu conoce un persona cu curazon grandi. Su bida como ser humano, e vision, e logronan y e plan cu e a laga atras pa Aruba ta impresionante. Un persona por trece cambio. Pesey nos tin cu conmemora e fecha di fayecimiento di Juancho Irausquin.